



## 流浪狗流浪貓

佢從細到今毋識畜過動物來做伴。因為從細在都市大个，爺衰稅屋个屋主大部分都毋好細人仔同動物，驚吵又驚會裝壞家具，故所無機會好畜。係假使講分佢擇選，佢想愛畜狗仔，毋愛畜貓仔，可能係佢還細時節識分貓仔嚇過个關係。

佢四五歲邊仔，睡到半夜仔想愛屙尿，對灶下脣个窗仔前行過入去便所，一隻烏貓仔無聲無說企在該窗臺，圓碌碌个目珠金金仔看等佢，佢乜緊看等佢，麼人知佢莫莫風「喵」一大聲跳下來佢腳邊，佢嚇到幹頭飆歸去間肚，忍到天光毋敢出去便所也。

貓仔不時就係冷淡个表情，佢實在看毋識佢心肝肚在恁麼个，當然也有蓋多人畜貓仔做伴，日仔就過生趣。狗仔係看著主人就搖尾，看起來過熱情、過忠實，還會同人類搵手工作扭壞人、查走私，搵手青睞人个生活，係人類个好朋友。

阿舅就識畜過一隻細黃狗仔，該隻狗仔本來係流浪狗。阿舅同舅姆去公園仔運動，該狗仔緊跔佢等，阿舅看佢餓到瘦夾夾仔，頸根又無圈仔好掛鍊仔，應該係無人愛个流浪狗，就帶佢歸去洗淨來，拿食伸个飯菜畀食。隔日又帶去動物病院檢查，確定係無人畜个，也無麼个傳染病，歡歡喜喜帶歸屋下，成為阿舅佢等个一份子，安名安到「Lucky」。

表阿哥同表阿姊討个討、嫁个嫁，就伸阿舅同舅姆兩老，有 Lucky 樣陣就毋會無聊。有一站仔阿舅橫倒，腳膝頭骨頭必核，幾下隻月毋會騎車仔載 Lucky 出去散步。Lucky 每日在厥狗竇緊咕，舅姆高不將牽佢去散步，恁仔行下來，舅姆个身體嘎變好、腳過有力也。

Lucky 係幸運个意思，學老話講起來像東西跌核个「落去」，佢還噓講哪日仔 Lucky 莫正經「落去」也。無恁著有一擺阿舅帶佢去市場仔，將佢綁在車仔手把，菜買好出來一下仔嘎就無看著也！阿舅十分傷心，表阿哥在網路貼尋狗仔个消息，好得一禮拜零就尋著也，阿舅像暢壞也，將 Lucky 扒纏纏。蓋像自家个細人仔打毋見核，無簡單尋倒轉來个痛惜。

今佢歇个販屋脣口就係大樓，不時會有人餵流浪狗、流浪貓，狗仔貓仔就越來越致多。為著搶食搶地盤會相打、相戰，降子个狗嫌貓嫌又特別惡，莫講細人仔會驚，連佢大人看著佢等相逐乜閃遠遠。希望該兜主人毋好畜畜啊又掉核，狗仔貓仔乜係生命，擢核佢等實在蓋衰過，又造成環境局糟个问题。也希望想愛畜動物个人毋使去買，做得領養流浪狗、流浪貓。

作者：吳秀梅

### ☆詞彙學習☆

【裝壞】zong' fai'：弄壞。

【樣陣】iong ciin：做伴。

【擇選】tog xien'：選擇。

【咕】ku'：狗的哀鳴。

【無聲無說】mo' sang' mo' sod'：無聲無息。

【扒纏纏】led hen' hen'：兩手環抱得緊緊的。

【莫莫風】mog mog fung'：很突然的。

【掉核】tiau' hed'：丟掉。

### ☆文法學習☆

【緊看等佢】gin' kon den' gi'：一直看著他。「緊」是「一直」的意思，後接動詞，表示動作持續不斷。例：緊跔佢等（一直跟著他們）、緊咕（一直哀鳴）。